


No Servus, Diener und Habe die Ehre!

Etze kummt a ganz a ahles

Nej su wos

(aus n Fuchzichr-Juhrn - mr mechte sprechn: A Klassikr aus dr ollerorschn Zeit.

S ös vu menn Grußvotr seelich, n Zosche-Dochtr, und dou ös jo ne ganz vrkohrt, wenn iech n ban Vierlasn vrtratn tu.)



Dr. Richard Zasche

Dr Marsmensch

Wie ich mit Franzn najchtn vo enr wöchtichn Sötzung hejmging, komn mr ban Feuerwehrtorme vrbeine. "West de wos?" sohte Franz, "mr giehn amoul nuf und kuckn uns de Siedlung vo ubn o." A ös bei dr Feuerwehr und hout n Schlössl. Ubns sohte Franz: "Siech ock, dar Starn dorte wockt!" Röchtich, driebn ei Röchtung Irsee finklte a Starn, kom nehndr und wur of ejmoul ane Undrtasse. Raus stieg a Marsmensch. No, dar sog aus! Zun Fertn. Obr aus senn Lautsprechrmaule redt a oswie freundlich: "Jen us sow, iem rebeil!" Mr probiertn s ei olln mieglighn Sprochn - obr s holf nöscht. Dar Karl wockte ock mit sann Koppe, dar de aussog wie ane Ufntitte, und quiekte: "Jen us sow, iem rebeil!" Drbeine hieb a mr ömmr mit dr Hand of n Rickn. Dos tot ejsn wieh, und wie ich s n soot hotte, gob ch n ann Triet hintn nei, doß a a poor Metr vun Torme wegflug. A rollte obr ne nundr, nej, a blieb ei dr Loft hängn, schraubte o sann Hindrtejle röm und jommrte: „Sessej, sessej!“ „Du, ich ho s“, mejnte dou Franz, "dar pauert - ock vrkehrtröm. ‚Sessej sessej‘ hejßt ‚Jesses, jesses‘ und dos andere ‚Nej su wos, mei Lieber“.

"Oj, oj" (hejßt jo, jo) - pröllte dou dar Marsmon, und wor vur Frejde ganz aus n Häusl. Ötze worn mr fruh, doß mr minandr powidaln konntn. Alsdn de Marsianr sein of Drouht, kon ich euch sohn - die lasn sugor reglmäßig n „Allgaur“. Obr weil se ne woßtn, ei wechr Röchtung mir lasn, honn se s vrkohrt ogefangn. Dr Marsreferent fr Neugaablunz - dos wor dar - mußte s „Nej, su wos!“ lasn und sohte, de Referentn fr Hotntottisch hättn ne su gejommrt oswie ha salbr. Obr ötz kennt a perfekt paurn - ock abn vo hintn. Mir froutn n, wie a hejßt. „Isoj“, soht a. „Alsdn Josi“, soht ich, „wos wolln se denn dou bei uns?“ Wos ötze kom, wor euch intressant. De Marsbewohnr honn doch, wu dr Bauch ös, ocke su a Kastl, und ötze hottn se an Summr gesahn, doß mir om Bauche a Bauchkneppl honn. Und ufgelitte Bauchkneppl mit enn Zönnstejn ei dr Mötte wärn glej dou ubn große Moude. Josi wollte ane Knepplvrtretung ofangn. „Nej“, soht ich, „Mars ös Ausland, und dos gieht ock ibr n Expoteer. Kumm se ock orscht amoul mitte!“ Mir zweje kruchn önnwendsch nundr und Josi machte draußn o dr Maur nöm nundr. De Undrtasse bondn mr o ejne Schnure und zugn se wie ann Trachn hindr uns har. Drhejme stopptn mr dos Ding ei de Karasche, und fr Josin machte ich ane Bocht of enn aln Amibette. Orscht wollt a obr noch wos trinkn und hout mr n Benzintank leergesoffn.

Dos wor ane Nacht! Wie a sich hielehte, broch a mit n Bette zomm, und jommrte wiedr „Sessej, Sessej“. Dou lotte s o dr Tiere. S wor Edeward, dar froute, wos denn ei dr Karasche su wömmrn täte. Josi hoppete glei naus. Dr Marssendr ei dr Undrtasse tote meldn: Josi sellte stantepede wiedr nufkumm. "Lhefeb sö lhefeb (Befehl ös Befehl)", sohte dar und wollte mich ei sei Flugzeug neistoppn. "Dos gieht ne", sohte ich, „war word denn s Nej su wos schreibn?“ "Sö tschruw (ös wurscht)!" pröllte Josi, zug o menn enn Orme, on andrn Franz und Edeward, und bei dan Gereite lotschte ich ei de Undrtasse. S gob enn großmächtschn Knool - und ich wachte uf. De Undrtasse zommt n Glose log atzwee vur n Nachtkastl. Meine Ale stond vur n Bette und sohte: "No, du host enn schinn Offn hejmgbrocht heute!" "Wiesu? Ös a denn noch dou? Sessej, Sessej!"

Ötze wejß ich ne - wor worklich su a Marsianr dou odr ne. Franz und Edeward sohn, se hättn miech und ocke miech hejmgbrocht. Obr dan kon mr jo ne traun. Ejs ös söchr: Of enn Torm ei dr Nacht krich ich liebr nemieh nuf. Mejnt dr ne ou?
